



INATSISARTUNI

Partii Inuit
Randi Broberg

UPA 2014/131-1
3.4.2014

Pillugu siunnersuut: **Kalaallit Nunaanni nunat allamiut pillugit inatsisip allannguu-tissaata atuutilernissaanut aalajangersagaliornissaq pillugu Inatsisartut aalajangernissaat pillugu siunnersuut (Nunamut isernissamut malittarisassat ataatsimoorussat allassimangitsut (isernissamut malittarisassat) pillugit peqqussummik pilersitsinissaq, paasisassarsiorluni suliaqarnerit assigisaallu pillugit maleruagassanik aalajangersaanissamut pisinnaatitaaffiliinissaq.)**

(Inuussutissarsiornermut Aatsitassanullu Naalakkersuisoq)

Partii Inuit maluginiarparput, naalagaaffiup Danmark'ip isumaqatigiissutit naapertorlugit pisussaaffimminik naammassinnissinnaanissi anguniarlugu, naalagaaffeqatigiinnerup aqqani inatsisip Danmark'imi atuutereersup Kalaallit Nunaannut atortuulersinneqarnissaa.

Tassungalu atasumik Inatsisartut tusarniarneqartut, allannguut taamaatsillugu maani atuutilersinneqassanersoq imal. Inatsisartut tassunga qanoq isummerniarnersut.

Siunnersuummi atuarneqarsinnaavoq, aalajangersakkat assigiinngitsut amerlassusiligaanngitsullu, atortuulersinneqarnissaat nakkutilliinermilu atorneqalernissaat pisinnaassappat, Inatsisartuusugut paasisutinik tunngaveqarata piumasaqaatit suugaluarnersut akuerissagigut.

Siunnersuummi erseqqissarneqarpoq, naalaggaaffimmut iserniartunik nakkutilliineq 31.10.2011'mi aallartittumik, taamalu iserniartoqarnerani uppersaateqarnikkut ajornartoormi naalagaaffimmut isersinnaanermut akuersissummik pilertornerusumik tunniussisinnaanissaq pineqarluni maj 2012'imi aallartittumik.

Taamatuttaaq erseqqissarneqarpoq Kalaallit Nunaat suleqatigiinnissamik isumaqatigiissummut pineqartumut peqataanngitsoq, 1996'imi Danmark'imiit isumaqatigiissut pineqartoq suleqatigiissutigineqaleqqaarmalli.

PARTII INUIT TIKKUARUSUTAGUT,

1.

Nunatta Danmark'illu akornani angalanermi, suminngaanneermermut kinaassutsimullu uppersaammik takutitseqqaanngikkaluarluni isersinnaanerup ammaanepqarnissaa tunngavilersuutigineqartoq pillugu,



INATSISARTUNI

Partii Inuit soqutiginarillutigu paaserusupparput, 2011'imiit ullumikkumut pissutsit sutigut allannguuteqarsimmammata, aatsaat massakkut suminngaanneernermik kinaassutsimillu uppersaasarneq aporfingorsimanersoq.

2.

Siuliani Partii Inuit tikkuakkatsinni suminngaanneernermik kinaassutsimillu uppersaasaaqaannginnissamik piviusunngortitsisoqassappat piumasaaqatigineqarpoq, Schengen'imi isumaqatigiissutip immikkoortui erseqqissumik amerlassusilerneqanngitsut suussusilerneqanngitsullu, atuutilerseqqaarneqartariaqartut.

Partii Inuit aamma tamanna soqutiginarillutigu paaserusupparput, Schengen'imi isumaqatigiissutip immikkoortui erseqqissumik amerlassusilerneqanngitsut suussusilerneqanngitsullu suussusilerneqarnissaat; tassa Schengen'imi isumaqatigiissutip immikkoortui sorpiaat pineqarnersut erseqqissaavigeqqarput.

3.

Minnerunngitsumillu Partii Inuit soqutiginarillutigu paaserusupparput, naalagaaffimmut isersinnaanermut akuersissummik pilertornerusumik tunniussisoqarsinnaanerani, uagut Inatsisartut pisinnaatitsissummik Naalagaaffimmut tunniusseqquneqarnerput, nalullutigulu akuersinerput qanoq kinguneqassanersoq ilumut akuersaaginnarniarneripput?

Tamanna apeqput aamma aatsitassarsiornermut atasumik avataaniit suliarortitsiniarnermut attuumassuteqarpoq. Partii Inuit tassani aarleqqutigaarput, aatsitassarsiornermut isiginnaartuinnartut inissinneqalernitsinnut annertusaqataallunilu sukkatsisaaqataassasoq.

4.

Inaarutaasumik Partii Inuit erseqqissaatigiinnassavarput, paasissutit tunniunneqartut taama annikitsigitillugit – aalajangiinissamullu tunngavissat taama annikitsigitillugit, innersuussutigissavarput siunnersuutip aappassaaneerneqannginnerani, Inuutissarsiornermut Ataatsimiititami minnerpaamik naliliivigineqassasoq isumaliutissiisoqarlunilu, makku pillugit:

- a) ilumut suminngaanneernermik kinaassutsimillu uppersaasarnermik apeqput piinnarlugu, Schengen'imi isumaqatigiissummumut ilanngutsinniarneqarnerput akuerissallugu silatusaarnertut taaneqarsinnaanersoq?
- b) ullumikkumut pissutsit suut allannguuteqaramik, allaat Schengen'imi isumaqatigiissummumut ilanngutsinniarneqarluta? Siornatigut nakkutillineq qanoq ingerlanneqarami, suullu misilittakkat pigineqaramik?



INATSISARTUNI

- c) Schengen'imi isumaqatigiissutip immikkoortui erseqqissumik amerlassusilerneqanngitsut suussusilerneqanngitsullu sorsipaanerat qanorlu pituttuinissaat erseqqissaavigineqartariaqarmat.

Taama Partii Inuit oqaaseqarluta, qujavugut.